



山東黃縣知縣始吾任公暨配支太孺人合葬墓

表

哈佛大學漢和
圖書館珍藏印

始吾任公諱宗湯字子中先世山陰桑盆里人宋季徙
蕭山鳳堰十餘傳爲登仕郎鳳橋公生子成八府君是
爲公父公兄弟三人公最少童年父母俱歿育於登仕
君登仕君年邁家業日廢鬻舊廬僦城東數椽居焉偕
仲兄攻苦力學弱冠補諸生感奮有遠志試輒高等癸
酉登鄉薦再上春官不第就教滁州曰青氈閒適庶畢
吾事至則自課以課諸弟子滁故饒勝地豐樂醉翁去

郭里餘遇佳辰登眺不廢而嚴立社會月有殿最弟子咸精其業先是州士不與解額者十科是後王君嘉賓賈君巖黃君兆熊孫君克振聯翩上第者數人主校關中若今方伯趙君彥銓曹王君建屏辰州守馬君協皆所得士也庚辰都試罷歸擢山東黃縣令公曰吾竟阨一第耶然矢心效職吾未敢多讓爲令以愷悌爲本尤重刑獄終始未嘗遣戍一人偶錄重囚得其寃狀爲白卹刑改戍公曰旣寃矣何戍之爲復爭之案臺竟得脫次年大祲隣邑羣盜並起公施賑有法環堵宴然至夏

秋有年禾麥兩岐邑民爲建雙瑞堂以旌其德方祲時虞有軼寇特嚴鎖鑰常夜出偵之聞里兒書聲可喜旦日召問之曰陳孔道因爲獎諭教之文義其兄周道已從賈人遊矣感悔願受業如弟兩歲中學使者校士兄弟以次冠諸士其喜於作人如此然性侃直不習逢迎邑中貴人有所屬弗爲動論如法貴人大恚乘間媒孽之方秩滿議徵竟左遷遂解綬歸是時公年始艾抵家絕不聞外事築精舍於郭外山麓莊曰足老軒曰聊適晨起命小童持茗隨往行坐惟意會景成詩或邀故友

攜奕棋留連竟日晚歸呼二子考問所習有不愜好言
諭之亦未嘗動於顏面兄弟白首友愛特甚伯兄嗜酒
常儲嘉醪過卽沾醉仲兄善爲禮動卽咨稟事如嚴師
每顧念鳳堰故居不可得得其旁舍因捐金構宗祠歲
時率子姓供祀其下是時公去黃二十餘年矣一日撫
臺高公舉檄縣具禮表其門口東土循良蓋高公爲淄
川人去黃近則黃之遺愛可知也公以貧失婚旣爲諸
生始娶支孺人少公九歲先公一歲卒痛之甚時呼二
子命曰若知吾所以悲乎自吾業儒孤阨失所惟汝母

佐以機杼紡績於是得肆力於文章逮入官戴星出入
汝輩延師婚娶皆汝母主之今者躋休許久予知招尋
遊覽而已酒脯供具未嘗少失吾意謂宜助吾終老今
若此寧獨爲汝母悲耶恐吾命不得久長因欷歔久之
未幾疾作踰年卒壽七十有六時萬歷癸丑歲也子二
長三宅次三俊皆庠生孫男四鄰四郊四邦四郡孫女
五人曾孫男五恭五肅公謝政最蚤居家最久各位旣
不大顯所負亦未盡施用而治行溫良飭躬端雅潛見
可兩無愧余旣熟鄉里所稱又少與二子遊所聞益悉

逮從諸大夫後時見公言笑動履皆秩秩有度真吾邑中之表也用是書之墓上以志不朽

賜進士出身右春坊右贊善兼翰林院檢討眷晚生來宗道頓首拜撰

宋處士南隱任公墓誌銘

至正乙未秋余出使江南道經蕭山適遇則誠高先生於任氏館先生勝談故友任公德義誠愷悌人也嘗所往來皆當代名卿他如侍郎聶公子初錄事董公朝宗提學劉公伯溫判官邁公善卿文學王公子充至必延歸別業商確古今留之歲月而不忍舍去久而益親世所罕有今公歿葬有十六年矣而墓石無文允子嗣顯以余與先生交之素奉狀丐銘以垂不朽幸而賜之則九泉之下光榮萬萬矣誼不獲辭按狀公諱昌字文昌

號南隱姓任氏始祖鑰宋建中初宗人伯雨薦除左司
言時忤權貴因去官建炎中復宰山陰令卒於官其子
种卜居是邑之桑盆里曾祖銓祖定翁由桑盆徙蕭山
昭明鄉今爲蕭山人父京倉副使諱寶母袁氏宋淳祐
辛亥三月初六日生元至元後庚辰四月十一日卒享
年九十是歲九月庚申葬里之北幹村先塋之右配姚
氏繼何氏子四嗣顯嗣榮嗣興嗣華女二俱適士族孫
男十一人曾孫男二十七人嗚呼余生也晚未嘗識公
然以其友觀之則公之爲人可知矣叙其事而追銘之

銘曰積善之家何其懿也才德之全何其偉也奉親顏
色孝之至也事兄怡怡義之至也交友惇惇情相比也
動容中禮心無累也存心愛物中平易也設厨濟饑周
貧匱也婚喪以助厚其施也鄉邑推尊重其真也隱居
弗耀樂其志也振振雲初豐其裔也觀化以正儵然逝
也我銘其墳千古永其世也

元至正十五年歲次乙未九月戊寅日正議大夫兼集
賢院事吏部尚書山東劉謙譔

元處士任子仁公墓誌銘

越之蕭山任長者曰榮生於元至元甲申九月十有七日年八十二卒之歲迺至正乙巳五月六日也配包氏先二年卒其子曰謙曰厚其孫曰源素斌衛恕銘雋其曾孫曰泳濬溫淦洵沅溥湘濂湛澈濤相率爲塋於里之去虎山原以丙午十月十一日奉長者包夫人之喪合窆焉洪武甲子余考試於杭謙遣源來請曰先人葬十有九年矣而墓隧未有刻詞大懼潛德泯泯無以示後世子知先人者請書其事刻石垂不朽焉敢再拜命

源以請余辭未暇既卒事復遣源迎致余而面請余於長者父子孫厚善文雖不工而辭則非義乃爲之書曰長者諱榮字子仁姓任氏蕭山人曾祖諱定翁祖諱寶父諱昌世有令德長者持身端謹事父母孝處兄弟和待人恭遜姻族里黨各盡其道敏於治生家裕而不鄙吝貸人以錢而不屑屑於子母推食解衣免人饑寒而無德色平居不事表暴與人交無鉤距有患難必扶持之山陰仲君理以將仕郎來主縣簿卒於官其子甫六歲不能歸葬長者買地北山葬之而善視其孤寡縣尹

裴景達之夫人卒長者待之如仲簿治家嚴而有法以故子孫同居合食無間言凡縣令丞之賢且仁者無不敬重長者然長者從容一語未嘗及於私至於愷悌及民之說則深致意焉由是有長者之稱嘗誨諸孫曰吾以少小持門戶不遑學問至今恨之若等上有父兄飽食終日而不學豈不惜乎去家三里爲塾俾講習其間提學劉公伯溫名之曰蕭然山堂待制王公子充爲作記又構樓於家之側大延致師友課諸孫以學尤善賓客而其里爲吳越道所出名公鉅士東西行過無不禮

焉館穀必豐贖遺必厚我先君左司之宰蕭山也時張士誠據吳方國珍據台慶詩所謂顧瞻四方蹙蹙靡所騁之日也劉提學伯溫高主簿則誠董錄事朝宗諸公皆來依而朝使若吏部尚書劉自牧刑部侍郎聶子初並在長者曰於我館時長者老矣又性不飲酒而朝夕相與酣嬉笑談至於越月至於逾時至於卒歲而交情愈篤人益以爲難能嗚呼田文爲封君而門多食客長者則布衣也鄭莊喜通賓客而不免招權納賄長者則言不官府也然則長者豈獨賢於當世之人而已方諸

公集處時余嘗獲從其後而與長者周旋未嘗不歎一時賓主之盛今凋謝盡矣風流雲散矣而余以後進執筆記長者遺事能無感慨乎然長者晚年雖更喪亂而享有上壽令終正寢喪葬以禮而子孫之盛多如此源篤學有文克承長者之志則何憾焉

銘曰厚德之士全福之人影不出戶令譽四聞門多駟馬坐列縉紳圖史左右觴豆具陳載獻載酬笑言溫溫不以炎涼而爲踈親趨而過庭有子有孫旣嫻於禮於燦其文孰不嗟咨積善之門自我不見三十秋春其人

遠矣室亦不存緬想高風勒詞斯墳尚俾涼鄙胥爲寬
敦

洪武十七年歲次甲子前國史院翰林編修眉山蘇伯
衡撰

處士伯大任公墓誌銘

君諱謙任姓字伯大主一其號也越之蕭山人曾大父
寶大父文昌父榮俱不顯君亦善自晦旣善其身又善
其族以此馳譽縉紳間前太史王公嘗表其行於文字
尤爲誠意伯劉公所雅重君爲人敦厚寡默循循有禮
度事倉猝中未嘗疾言遽色自少而壯而老言行交際
表裏如一故鄉里之人望其衣冠卽其威儀無不景悅
者君壯歲與吏部劉公最善劉數劾上之君輒以親老
辭謝不起元季兵動劉薦之益力君堅遁爲自全計天

台聞益民抱經術遊公卿間客歿武林君買棺槨備衣衾殮之資其鄉人俾還葬焉君之父嘗構蕭然堂於去虎山之麓招延名士大夫觴詠其中以娛老既而毀於烽燧君卽其所則興霜露之悲遂因其故址築而新之以棲其親之神諱日朔望躬率子姓往奠涕泗哽泣使人不能仰視其追慕哀痛有如此者君於弟厚友愛尤篤君家業素封凡經紀之勞門戶之徭君獨任焉遇一嘉味厚不共食卽不食厚亦克恭厥兄厚先君卒故編修蘇公伯衡銘其墓君一讀其銘幾於殞絕厥後子孫

相戒不敢面舉其詞其篤愛同氣有如此者妣包氏大德丙午七月三日而生君君年七十有三正襟斂容而逝今洪武戊午十一月十四日也明年十月葬縣北去虎山之先壟配汪氏後三年卒合兆焉子男四長源舉明經命未下而疾革後君十年卒次素次斌次衢孫男八人泳濬溫清溥溢激津曾孫男六確巖旭冀滂瑾君葬十有七年少子衢具君行述來泣拜曰先君不幸長孤源斌相繼下世墓石未有刻詞大懼先德之泯以重衢之辜敢狀以乞銘焉經痛惟先子有通家之好幸嘗

印

執役左右承君之譽追感舊情敢不辭而銘之

銘曰猗與任氏世有隱德子承父詔孫順祖則神明可
通孝弟無忒天爵爾崇人爵爾嗇豈曰邁種綿降孔赫
我卜我筮匪著匪龜輿言允從事與理揆傑構之營厚
固在基銘斯勒斯式昭後來
迪功郎國子助教致仕曲江張經拜撰

處士叔大任公墓誌銘

至正乙未余侍先君爲令蕭山閒從青田劉先生永嘉
高先生之後過叔大家見其處父兄之間恪盡孝道未
嘗不嘉歎其賢也別去二十餘年再過之叔大死則葬
矣俯仰今昔爲之泣然而其孤恕再拜求作墓銘其何
可辭乃叙而銘之叙曰叔大諱厚字叔大世爲蕭山士
族諱寶之曾孫諱文昌之孫諱榮之子也爲人方嚴好
學而多材且冠矣處二親側依依猶孺子頃刻不忍離
去由是絕意仕進其父喜交賢士大夫作樓居以待四

方之過客供帳無虛日叔大奔走將事惟恐失父之懽
心而賓客無不以爲能事其兄伯大如事父同室廬以
息合釜爨以食怡怡如也畧不見有後言中遭兵變焚
蕩不得已析居有無相通休戚相關一味之美兄不至
不食猶昨日也其從子源篤經術與遊者皆當世偉人
公欣然喜溢於面又從而資之晚歲以齒德俱尊推爲
縣三老出入公門未嘗有私謁亦不務爲容悅事便於
民官長以爲不可行叔大毅然曰不可不行苟於民不
便官長欲行之叔大固執以爲不可行而陰受其賜者

多矣雨暘愆期必齋戒以禱若職乎民社者洪武十三
年詔列郡纂志書郡以屬縣縣以屬叔大叔大曰此關
係豈輕也我烏能獨任哉引里中老成者與共事旁搜
博采山川地里人物風俗以至沿革一不敢苟亦不敢
遺書成上送郡其功居多云十五年春正月十有七日
卒於正寢享年七十有一其夏五月廿有一日附葬去
虎山先塋下叔大兩娶皆張氏一曲江人一同縣人丈
夫子三長恕次銘次雋女三長適黃篋次適韓肅三適
黃權恕之子二沅洲銘之子一濤雋之子三洹洵湘

印

銘曰猗叔大甫倜儻之士亦既能弟匪直能子才足有
為譽望攸歸篤於養親遂與世違初不有位豈有民社
雨暘為沴何預乎我齋祓祈禳起處靡違曰憂民憂君
子之常進不同塵退不忘世優游卒歲是以為貴

洪武十七年歲次甲子十月二十日前翰林國史院編
修官眉山蘇伯衡撰

貞素居士任公墓誌銘

先生諱衢字原庸號貞素居士其先山陰桑盆里人宋
紹興中由定翁處士來蕭山遂家焉曾祖文昌祖嗣榮
父德謙皆隱居弗仕先生嗜讀書延賓友惟務真率不
尚華侈嘗所往來如劉蘇王宋諸公皆當代名儒悉館
穀而就教焉先生篤於事親友於兄弟尚義好施樂善
不倦不修邊幅諱論人過失凡宗族婚葬有未備者助
之故舊饑寒相告者賙之丐乞有襁褓者卹之己卯夏
先生適舅氏舉家伏枕煙火幾息鄰族絕迹先生親為

湯藥逾月患者悉瘥鄉人難之辛巳秋有司督民漕運
赴北京驗丁均派貧民徬徨無措先生上書論便民事
言詞切直布畫有章有司從其議民始安業一日令僕
往山場市木商者忘收其價僕喜走告先生曰與盜賊
何異亟遣還之又舟次往螺山欹岸忽崩暴金一餅先
生命僕取之僕給曰銅也先生卽不復顧幾半載其僕
築室買田如富家先生聞而喜曰渠得濟矣凡邑大夫
初蒞者必詢民間利病先生以直告凡與鄉飲必端莊
謹飭率衆賓先嘗與助教張孔升吏部顧景繁教諭高

景昇觴咏終日樂天之年先生博通經史長於詩什尤
善草書有貽笑集傳於家先生生於元至正丙戌九月
一日卒於明永樂戊戌七月十九日享年七十有三娶
山陰童氏無子繼娶邑人童氏俱先公卒子男二溥澂
溥早卒女一適趙載孫男一瑾孫女三一字二在室以
是歲十一月乙丑葬於由化鄉去虎山之原與童氏合
兆焉襄事日一守遺訓不作佛事唯遵家禮其子澂與
予有斯文之好特乞銘弗敢辭
銘曰善之積福之基言可錄行可師敦孝義厚澆漓表

諸慕耿若斯歷千禩永弗隳

賜進士出身兵部主事通判河間府事同邑俞廷輔譔

處士任公齋公墓誌銘

丙辰春余以供賦至蕭山館於任彥法氏山堂暇則與
余講孝行事欣然有魚水之相得追念古人有如此者
何今之莫若也曰何有於是吾兄溥穎悟罕比八歲時
太史蘇公伯衡見而奇之爲作祝辭而稱之期以遠大
未弱冠隣有盜官物事泄逃不獲有司以里隣拘解而
父與焉兄詣縣請代父行邑大夫從之繫獄凡數月同
累者多致死兄獨無恙而還母患疾篤潛割股進糜以
食之疾尋愈一日坐市肆忽一媪携白金一裹送子從

印

蕭山任公齋墓誌銘

天恩堂

蕭山任公齋墓誌銘 卷一 公齋公墓誌銘一 天恩堂

成忘於几上兄袖而還之媪感謝而去平居惟事書史
孝親友弟睦宗族和里閭深有古人之風使天假以年
則兄之所爲奚止於是乎言訖淚下曰兄之孝行如此
惜乎葬日石文未脩其責何逃焉卽秉筆書其事丐余
銘復曰幸勿靳俾孤識而不忘則存歿均感矣余不獲
辭按溥字彥公號公齋曾祖子仁祖伯大父原庸母童
氏生於洪武丁巳七月十九日卒於永樂戊戌七月二
十三日年四十有三葬去虎山先塋之下配黃氏子一
人卽瑾女一適峽山韓廷貴孫女一尚幼

印
銘曰窮達不關毀譽不論一德一行皆足以追配古人
爲其後者視我銘文

正統元年歲次丙辰六月朔旦僊巖樓觀撰

處士任士信公墓誌銘

處士諱景潮字士信高祖嗣懋曾祖德容祖原德父宗
睦鄉飲大賓母沈氏處士永樂壬寅四月十四日生宏
治丙辰四月初二日卒得年七十有五娶高平知縣張
公叔溫之女賢配也子男四長橋先卒次楠次桂次相
女一適士黃河孫男六孫女一相等卜以卒之又明年
正月初六日葬處士於先大賓之墓側以余知處士素
行偕從兄邦器請葬銘於余曰遵治命也義不得辭余
嘗為處士序世傳家乘知其裔本宦族遠祖曰定翁者

由山陰桑盆里徙居蕭山邑東昭明鄉凡幾世矣世務積善隱顯聞人代不之乏其德望尤著者則有任長者焉處士賦性誠恪宅心善良篤行君子也每自歎曰吾先人有能以長者各於世至今人稱之吾為後人反不之學尚何人哉乃刻志向善圖不泯世德凡可以立身大事必汲汲為之恆恐其不及故於父母於兄弟必孝必友推而至於祖宗雖遠且疏亦未有一念之或忘者始遷祖墓在北幹山之陽栽木久已合抱一夕為大風所拔者數根勢莫可生衆未有所處處士曰必易價生

印

息為修墓之資衆樂從仍歸處士掌握分毫不私寸積銖累歷數年遂至^贏贏餘於墓封則加崇厚於周垣則加繚築木之欹斜者則扶植之地之高卑者則平治之復於空隙之所增植衆木外豎石為門榜規制改觀煥然一新又花園南首亦荒蕪之甚從而補葺之如初增置祭田重造祭器鄉俗墓祭惟清明一行處士則益以十月朔朝之祭每祭畢則合族聚燕各其堂曰睦族見不專於食飲勸戒寓焉別有置田一十畝歲入租課公共預知則族人生不能以自給與婚嫁死葬無所備者量

爲貲助縣治之後驛道大街久甚殘缺車馬馳驅人跡
跋履往往爲之顛踣衆以患焉處士則盡出所有買石
鳩工從鳳堰東起去碎石而易甃之至菊花坊而止其
平如砥上下稱便先是縣治前道源橋直抵單家堰越
境則山陰諸暨浦江諸處悉由之以達其路在田疇中
行每水淫溢道路泥濘行者苦之寒月尤甚處士始欲
甃之以石工費鉅度不能全於是羅酒席宴父老勸集
鄉夫出力倡首卑者就高缺者就滿坦然一周歌呼載
道又先大賓葬湘山竹木叢茂多處士手植祁寒暑雨

必親往省視是皆羣耳目所共聞見者其平居見義必
爲之事未可殫舉卽其所爲所致本之實心措諸實行
其真古君子真能遠追長者之芳躅也使吾邑人皆如
是爲心則風俗何患其不古耶嗚呼處士已矣余旣合
公論私謚曰孝義矣復因所請據所見聞序而銘之昔
蔡邕銘人墓獨於郭有道碑無愧余於處士敢云

銘曰洵美任翁故家賢裔孝盡於家存歿兼致奕奕先
塋志興墜廢享祀以時聚族以禮義舉於鄉遠近蒙惠
堂堂路遠力脩缺潰身不辭勞財不惜費斯吾所由餘

不悉記存長者風造古人地康壽全歸銘墳何媿用示
後人亦勸斯世

宏治戊午正月日賜進士出身行人司行人正監察
御史同邑何舜賓撰

質菴任公墓誌銘

成化乙未十一月二十有五曰質菴任處士卒里閭長
幼咸嗟歎悼曰善人亡矣善人亡矣噫處士果何修獲
人人嗟悼若此哉余因考其行得士人蔡守學所爲行
狀恭知先子文靖公重其爲人愛其純樸雅素之行嘗
以質褒美之者富春高隱俞古章發揮無遺余故自訟
生也晚况仕於朝有年居鄉日淺瞻光弗獲是則是儀
徒覽此怏怏然嗚呼是可惜也按狀處士諱高字永行
居邑之夢筆橋東尋徙芹沂橋北當宋元時邑稱巨室

元末誠意伯劉公諮議叅軍王公皆館其家厥考仲傑
公得二先生之學以及處士故處士負才智識時務甘
守耕桑雅行純素冬一裘夏一葛居於重熙累洽之世
故其才智得無所施日與文人韻士徜徉於東阡西陌
之上送飛雲邀明月以樂其樂且與人奕弈雖三十二子
間而其克敵取勝若良將行兵焉鮮有與之頡頏且能
以勤儉教諸子孫或耕或讀皆有成效父慈子孝雍睦
一堂故尚寶司卿汪公景昂大書集義以華之處士高
祖嗣添曾祖德昇祖居實父仲傑母成氏配搖氏子男

昂

五曰昇早卒次曰昂曰昱曰晟曰旻孫男六鏞元鑑鈺
鎰鏐孫女六曾孫男一週曾孫女一其生也洪武丁丑
正月二十一日享年七十有九將以卒之年十二月九
日甲申葬西山父塋下先期諸孤衰麻踏余門請銘墓
上石余以不文辭者再竊聞宋應山連輔之以一布衣
死後能取重歐陽子表其墓以不沒其善若處士者生
時已獲先子以質表暴其生平尤過於輔之遠矣則余
膚淺敢不繼承先子之愛於其後乎但余言不足取信
於人是懼故勉序而畀之銘

蕭山任氏家刻卷十六
銘曰吁嗟處士實宋之連不慕富貴處世若仙既克有
德亦克有壽誥誥子孫是天之祐正寢而亡孰不垂淚
銘以彰之永昭世世

成化乙未季冬月日登仕郎鴻臚寺序班邑人魏完撰

處士惟昂任公墓誌銘

宏治壬子六月辛丑朏越十日壬子任處士惟昂卒既
葬其孤鉦衰經進於玘泣且告曰知先君者多矣矧吾
子先君之內戚也知之尤最茲不銘恐晦德終罔聞於
後也玘憮然曰信竊視今古凡顯榮者各行自昭而潛
隱者多所不及余當志而銘之誌曰處士姓任昂者處
士之諱也惟昂者處士之字也碩大而頎處士之質也
溫溫其恭匪矜匪飾者處士之性也養高自愛不污於
時者處士之志也居處澹然取予不苟者處士之行也

印
載耕載蠶自食其力者處士之勤也至若貢賦時輸征
力輒往處士之忠於上矣承奉厥考冀穢親潔如是者
幾十數年處士之孝於親矣兄弟怡怡表儀鄉黨處士
之友於兄弟矣故舊締交大發爾忱處士之信於友矣
教誨爾子有孝有德處士之慈於子矣家政凜如庭無
間言處士之善於家矣名士大夫相爲文章頌美幽德
處士之有聞於邦矣處士之大父仲傑父永高母搖氏
生於永樂庚子四月十三日卒於今年六月十四日春
秋七十有三配張氏子男一卽鉦娶方伯史公翼之曾

印
孫女女二長適趙潤次適張紳俱崇化里人也孫男一
恩孫女一未字嗚呼處士可謂無忝於所生矣
銘曰孰云召南德潛弗馭俯仰優裕其樂揚揚孰云龐
公旣勞旣飭遺安之道君子是式倚與處士若人之儔
令聞令望今古同休
制舉出身修職郎湖廣蘄水縣縣丞張玘頓首譔

尚古居士任公墓誌銘

任公物故兩越歲月余謝事家食厥子鑑字則明者衰
經詣余曰不肖孤痛先人歿弗彰德敢請大人先生誌
以彰之再拜再懇余謹按述以誌公姓任氏諱昱字惟
昱別號尚古趙宋建中時左司言鑰以忤權奸遷山陰
令卒於官子种遂家山陰之桑盆里五世祖定翁始遷
蕭山居昭明里高祖德昇曾祖居實祖仲傑考永高悉
以德禮爲家業行各相望逮公克篤前修公性鯁介不
吐不茹不溷不絕不苟取與善處困約遇時祭輒引諸

子姓倡孝敬事祭田餘入必益祭器不聽外費子姓遵之故其祠禮不以繁少殺邑大夫聞其名舉為耆宿率下親上以勤以公成化癸巳歲海潮鬻隄蕭民幾魚鱉當道命公築隄捍患公戴星出入迨朞月始告成勞勸一終始役雖久民舉弗厭怠舊害悉除民遂生理德之者如出一口學正張公尚質教授蔡公宗學輩悉贈以言有新築沙隄惠在民之句訓子姓必身先行誼致厥子鑑授徒鄉校以詩名近遠大尹吳侯好標榜文學以少博童炊沙為邑領袖屬之延山陰徐無齋立詩社會

則明齒其首列僉謂家訓所及也諸姪鏞鈺輩咸敬奉之如所生厥弟肅齋與公俱年踰八十相敬愛如少時公族屬計萬指強每當時祭集禮享肆筵以燕公必愈整儀刑刑諸子姓宏治乙丑膺尊年詔易公裳怡怡桑榆鄉評曰齒德惟稱公讀書尤精天文歷數著選吉成書一掌金諸編識者躋其見正德己巳春正月疾病與鑑言曰吾家世儒死當禮斂葬我無越鑑一如命是月六日卒年八十有五十有二日與厥配范合葬西山社壇里之原蓋先塋右阜也母搖氏有闡範公生於洪熙

蕭山任氏家範卷十六
乙巳十二月十有一日配范氏先公三十有九年卒生
一子卽鑑娶賈性之之曾孫景琦女有孝行女一適僊
巖鮑敷繼娶孫氏生二子鉷鐘早卒女一適蘇潭王傑
孫男一經曾孫女一尚幼於戲吾以公生斯世殆亦無
負於天者天豈負公乎因爲之銘

銘曰并有泉瓶緝其懸士也律其愆坎壤厥纏啓跖倒
顛古今乎同然嗚呼蒼天吾以銘其阡

賜進士出身南畿刑部郎中知福建興化府事同邑張
嶺譔

任冢婦金氏墓碣銘

任族之盛在蕭山昭名里居寔前代故家遺俗元末皇
明初若諱伯大叔大者隱居樂道有長者風學士大夫
高劉蘇王宋公皆故元遺逸逋播來就館穀且依德也
百廿餘年奕葉聲聞不隕間有諱德輝者生志善志善
生仲安咸篤於行義而諱謚則仲安所生行義克類乃
生益之茂之昆季允稱食子收子而大其宗是必有賢
配相助君子不然曷以致今日之盛耶余固偉亢宗之
難究問宜家之賢一日益之自具簡狀令其弟茂之持

以造余徵其棄世內助金氏墓銘夫內助之賢本其世積不可以無傳按狀金其姓字閨英里仁鄉金仕全之女母徐氏甫笄歸益之是爲豕婦性溫良勤慎躬親紡織克盡婦道助夫卿成家事舅姑許其孝處妯娌稱其友撫育子姓盡其慈勸兄弟同心率長幼以和煦煦訓勵子姓無彼此間俾各業其業舉有成立是皆柔道輯睦所致此宜有壽享爾遐福未躋中壽以疾不起命也夫生正統十二年丁卯十二月二十二日卒宏治十五年壬戌十一月二十九日享年五十有六子男四遞迹

遺庠生超女一適湘南孫聰孫男四斯立斯行斯來斯和皆幼女二幼在室宏治十七年甲子正月十一日葬於湘湖西山陽之原從卜也嗚呼有前之積善必有後之餘慶使後之擇配弗獲其良則睽之所起責之誰哉此在豕婦而相家如是信乎世積所鍾及後之遠大又未可量也宜有銘

銘曰婦之良家之臧食其報來禎祥迺前之積裕後之昌厥有子姪將爲邦家之光妥靈宅兆負山面湘貞珉不腐幽潛愈彰

奉訓大夫知雲南師宗州事同邑陳殷撰

福建候補鹽大使任府君壙志

府君諱國任字聽樵蕭山縣人也琅玕樂安冠瑰才於南梁中州新息縣寶胄於北宋分桑盆之裔隸固陵之版曾祖諱廷樛祖諱焜父諱元坡茂世序祊素德貽嫻青閭載式軌緒宏焉府君少尚節敵長度肄疋謝斟懃以持稱懲握躡而抱瑜精爽青巒之姿咳唾明月之彩由國子監生入貲爲九品官就安徽試用膺長吏之二百石列香尉於左右丞惟孟東野不卑小官是陸景清可升最籍旋以亳州軍功超署照磨聽事滌焦邑之祆

彗牙門繳符飽皖流之淳泉鈴下趨鼓實驄馬之始徑
敢委蛇於末佐時例引

見奉

旨進課鹽大使試用閩中府君遂攬粵王趨彰武摩玉
融以呼隼灑螺女以活花方期均輓緩徭閔逋儲羨師
杜中立之籌筦輔錢子暄之忠清而長鞭遽折枉聽劉
越石之雞窠氣不祥竟淹夏侯湛之騎嗚呼哀哉府君
生乾隆四十七年十月十三日卒以嘉慶二十五年七
月二十五日閱春秋三十有九歸葬於邑之呂才莊厥

印

配王孺人祔焉霜楸墮葉颯乎古原風楊淒蟬送以頽

照棄觚之志鑄硯之才恆茲泯冢已府君生事鉛槧攻

於比興外汰油鉸中纏宛變陔黍之笙三奏湘蘅之佩

百結此情雲萼有辭雪霏杜煦曰柯籬聲也蔡名衡曰

江州淚也丁文濬曰蘭成悲也可謂知府君者矣所箸

硯鄰集若干卷已付梓青岳丹壑家學遠纘園箕方冶

遺笥後守九隧惟靈亦足慰與嗚呼北幹蒼蒼曷宵乎

雁翔西河瀾瀾曷瞥乎驅逝晨輻闕耶崑表俟耶疇抗

垂簫亦闕虛謚朱陽之館皋禽不旋劉喬之賢空山委

氣立石以誌庶揭隱於永永焉子一名淇孫五祖模祖
楸祖枚祖桐祖楨也惟楮之拓用播其流棗曰砥在槃
弗讐於往者

蛟川世愚姪姚燮復莊拜譔

任氏續置墓田引

蕭山以舊家稱者任氏爲最蓋以其敦孝弟崇禮義也
先世若伯大叔大原禮原庸師古彥法皆有善名置田
二十餘畝以供其時祭拜掃合族之需且冀後人能繼
其志焉歲成化辛卯之秋颶風揚威連拔祖塋大木數
株時有啓東景潮美等相與咨謀於衆以之易價經營
數載利漸厚而可以興事仍續置田七畝歲收租若干
凡祭器之類俱以完備但一族之中支派繁衍吉凶之
事每相協助其間富貴貧賤或有不及期者復以續收

租粒擇宗族之相事者遞相主管遇有協助之數必諒情而行有所餘則於祖塋之內栽植樹木修理墻垣俾永久不致荒頽嗟乎此舉之盛其孝弟之大禮義之性藹然洋溢其有益於風俗豈淺鮮哉余蒞任蕭山四載名啓東者博雅之士常相款接素聞其家世之善今余欽召還京啓東復偕器之景潮邦器持續置墓田卷丐余言以訓於後嗟乎任氏子孫其相與聚念千百世如一日可也孝弟禮義與生俱生夫豈不之敦不之崇者哉

成化十八年歲次壬寅秋日賜進士出身知蕭山縣事
義興吳淑譔

MICROFILMED

蔚山任氏家乘

卷十六

MICROFILMED

